

լութիւնն Յունաց վասն սոցին իրաց , և Հայք բազում վնասիւք պաշտպանեցին զիրաւունս իւրեանց , (1820—21) : Յոյնք յաւելին յարուցանել զայլ իմն վէճ , զի բանալի արտաքին երկաթեայ դրան եկեղեցւոյն Բեթղէհէմի գոլով 'ի ձեռս նոցա , 'ի գնալ անդ ուխտաւորացն Հայոց , տային սպասել առաջի դրան , և հուսկ ուրեմն բանային զդուռն թշնամանելով զնոսա : Եւ ապա հնարեցին զայլ իմն նենգութիւն . շինեցին 'ի վերայ երկաթեայ դրան տախտակամած քիւ (սաչաղ) , պատճառելով զգօրս արքունի , որպէս թէ 'ի նստիլ նոցա առաջի դրան պատսպարեցին յարեւոյ եւ յանձրեւէ , այլ Հայք ամբաստան եղեն զնմանէ , թէ գողք և աւազակք ելեալ անտի մոտանեն 'ի վանս նոցա , և զկնի քննութեան ետուն քակել զայն (1819 . 'ի 20 Փետրովարի) , եւ քարամբք յարդարեցին զյատակ արտաքին գաւթի եկեղեցւոյն սակաւ ինչ իբր բաժին Հայոց , հաւասարութեամբ պարսպի վանաց , և այն եւս բազում խռովութեամբ և վիճամբ , զի Յոյնք կամէին զրովանդակն յարդարել , որպէս և արարին իսկ ('ի 23 Նոյեմբերի) :

Արդ՝ իշխանաւորք ազգին եւ Պատրիարքն հանդարտեալ 'ի վտանգաւոր հոգոց , զի զբաղեալ էին վասն ազատութեան Տ . Կիրակոս Կաթողիկոսին տանն Կիլիկիոյ , որ արդիլեալ էր անդ 'ի Կոստանդինուպօլիս Արքունի հրամանաւ : Ապա յորդորանօք Պօղոս Պատրիարքի գումարեցան 'ի Պատրիարքարան ('ի 12 Յուլիսի) կարգաւորել զխնդիր երուսաղէմի : Նախ անպատշաճ վարկան զընտրութիւն Պօղոսի 'ի Պատրիարքութիւն Աթուոյն երուսաղէմի , զի կարի պիտոյ էր նա ինքեանց , և չէր արժան թողուլ նմա զայն Աթու , և համակամ հաճութեամբ ընտրեցին զնիկովիդացի Գաբրիէլ եպիսկոպոս , որ յայնժամ Փոխանորդ էր յերուսաղէմ , եւ գրեցին առ նա դիր շնորհաւորութեան , ծանուցանելով նմա զընտրութիւն իւր , յոր ստորագրեցին անձինք 17 և պատուիրեցին նմա հաստատուն պահել զԽորհրդականս և զկանոնադրութիւնն , զոր ազգովին հաստատեալ էին յառուրս Թէոդորոսի : Պահել առ իւր իբր օգնական զՅակոբ վարդապետ Լիւսգրացի մինչ 'ի Ձատիկ , զոր առաքեալ էին իբրեւ Փոխանորդ 'ի Կողմանէ իւրեանց , մինչեւ պարգեացի խնդիրն Բեթղէհէմի , և ապա տալ վը-